

Uttale i samband med planar om bygging av trapper på stien til Blånipa

Eksingedalen IL synes at planar om trapper i oppstiging mot Blånipa er svært positivt. Blånipa, 1035 moh, er ein av dei majestetiske toppane i Eksingedalen, der det den store varden markerer grensemøte mellom gardane Nesheim, Bergo og Yksendalen.

Det går fleire stiar til Blånipa. Frå Brakestadstølen kan ein gå opp på Blånipa på sida mot Brakestad, via Demmefjellet og toppane oppover. Denne stien er noko bratt, og umerkt. Om ein går frå Nesheim, Bergo, Bindingsbø eller Yksendalen møtest stiane, og alle går opp same stad, der det no er plan om å byggja trapper.

Det er merkt sti frå Bindingsbø og Bergo. Stien opp frå Bergo vart rydda og merkt av grunneigarar fordi fleire nettopp strevde med å finna fram til Blånipa. Denne stien går opp til Mjelkeplassen, deretter oppover til Seterhaugen, før den møter merkt sti frå Bindingsbø ved osen av Breibekktjørna og heldt fram oppover i opnare terreng. Små vegvisarar viser vegen vidare, og stien koblar seg saman med stien som kjem frå Yksendalen. Denne stien vert no mykje brukt.

For å komma til topps må alle gå det krevjande partiet der det no er planlagt trapper. Slik det er no, er det bratt og ulendt. Med fleire og fleire som går her, er det fare for at jord, grus og sti glir ut. Steinar kan losna og ta med seg massar. Det er lite å halda seg fast i, oppstiging er «luftig» - og det vert av mange opplevd som uttrygt. Trapper vil gjera det trygt, og i tillegg vera eit spennande innslag som vil trekkja folk ut på tur! Å gå på tur i fine fjell er godt for folkehelsa!

Idrettslaget gjennomfører motbakkeløpet «Gygrakjeften opp» kvar haust. Dette er første del av stien både mot Yksendalstølen og mot til Blånipa frå Bergo-sida. Dette løpet endar på Mjelkeplassen. Her har også idrettslaget ein trimpost. Fleire og fleire nyttar seg av denne stien, også for å nå trimposten på Yksendalsstølen og for å gå toppturen til Blånipa. Idrettslaget ryddar og merker opp til Mjelkeplassen vår og haust.

Eksingedalen 14.03.2023

For styret i Eksingedalen IL,

Anna Sveinungsdotter Bergo